

ZOU PRESBYTERIAN CHURCH SYNOD
The Presbyterian Church Synod



NUPA TUNGTANG DAN
[Revised Edition 2020]

Published by:
Literature and Publication Committee
Zou Presbyterian Church Synod

ZOU PRESBYTERIAN CHURCH SYNOD
The Presbyterian Church Synod



NUPA TUNGTANG DAN

[Revised Edition 2020]

Published by:
Literature and Publication Committee
Zou Presbyterian Church Synod

NUPA TUNGTANG DAN BU

© Zou Presbyterian Church Synod

1st Edition 2006

Copy 500

2nd Edition 2012

Copy 500

3rd Revised Edition 2020

Copy 500

Published by

Literature & Publication Committee

ZOU PRESBYTERIAN CHURCH SYNOD

The Presbyterian Church of India

ASUNG A THU UMTE

<i>BungThupi</i>	<i>Laimai</i>
01. Kitenna tungtang.....	01
02. Kitenna Chituom	06
03. Kitenna leh Hattuom thununna kizopna dan.....	08
04. Kikhen, RL & RC pieh dan	12
05. Kikhen umdan	17
06. Hattuom dang toh kitenna tungtang.....	19
07. Revocation Certificate & Re-marriage Certificate	24
08. Hattuom Pawl dangte toh i kichimat dan uh	26
09. Marriage Revocation Certificate	30
10. RC Report Form	31
11. Re-marriage Licence	32

Bung - 1

KITENNA TUNGTANG

1. Hattuum Dan A Kitenna Umdan:

I Hattuum dan a kitenna in sil thum ahuop a tam anuoi ate ahi:

- a. Mihing umdan ding a Pasion lemguot suhtangtunna
- b. Pasion gam kehletna ding a Khristian innkuon bawl ding,
- c. Pasal leh Numei pumkhat a kigawmna leh kisiemna khu ahi.
Tuaziehin Hattuum dan a kiteng theite bou kitensah ding ahi.

2. Hattuum Dan A Kitensahna bawl thei dingte:

Hattuum dan a kitengsahtu dingte khu i hattuum khawmpi lien Synod in a guotte bou ahi. Tuate khu:

- a. Ordained Ministerte leh
- b. Probationary Pastorte ahi uhi.

3. Hattuum Dan A Kiteng theite:

Hattuum dan a kiteng thei dingte khu Baptisma tangsa ahi ngei ding ua, Baptisma tanglou khu kiten masang in Baptisma atang masa ding uhi. Tuachi in Hattuum dan a kiteng thei dingte khu tambang mite ahi ding uhi:

- a. Dan zoukim, tualeh dan sung a um Nungah leh Tangval
- b. Ji ahisihleh Pasal suun
- c. Kiten thasah ngaite [(Bung VI 5b(ii))]
- d. Midang toh kiteng thei ding a phalna Re-marriage Licence (RL) piehsate:
- e. Amau tawndan dungzui a thu-le-la gen lemsate [(Bung I (13))]

4. Kitenna Ding Theisahna:

Kitenna theisahna laitah ahilouleh puonkhiet khu Hattuum ah kiteng ding a um chi theisahna leh kiteng dingte khu Hattuum dan a kitenna alemnouna a umleh, mi koi in zong a gen thei hun ding hun honsah ding ahi. Kiteng ding khu theisahna lai kitah masang in Hattuum Committee in Hattuum dan a kiteng thei ahileh hilou uh a dong chien masa zel ding hi. Tambang a kiteng thei ding in (PCI Constituon Bung-III No. 2.b.i):

- a. Biehinn ah a kiten ding uh theisahna ni 14 sang a tawmzawlou lai tah ding ahi.
- b. Puonthaw ahilevang Pasion ni kal khat sung puon ding ahi.
- c. Aloutheilou a umleh Hattuum Committee lemsahna in kal khat sang a tomzawlou in a tomsah thei ding hi.

5. Dan sung a umte:

Kiteng dingte khu Hattuum dan sung a um, tualeh, pawl dang apat a hing lut danzoukim i pom thei ngalte ahi uleh, Biehinn a laitah ahisihleh puonsah ding ahi. Baptisma tan thasah ngaite khu kiten masang a tansah ding ahi.

6. Lungkimlouna ahisihleh hehna:

Kingaina suol a pua, asuolpi pen kitenpi utlou a, midang nei sawm a, Theisahna (laitah) ahilouleh puonsa khu, a khelpi pen in lungkimlou a, gel thaw a, Hattuum Committee a, hehna a hing tutleh, hattuum committee in a tung thu a gel fel ding a, kiteng ding a lem asahpi uleh kiten ni ding a guot pen ah kitensah ding ahi.

Biehinn zang theilou ding ahi uleh, Hattuum Committee in ahun guot ah Pastor Quarter/Local Chairman inn ah kitensah ahi ding uhi.

7. Kitenna ding theisahna laitah ahisihleh Puon kulloute:

Hattuom dan a kiteng ding hingal, laitahsah ngailou chi ni a um a; tuate khu:-

a. Laitahsah ahisihleh puon ngailou a kiteng dingte

Hattuom dan banglou a kiteng, kigu, kigai leh Pu-pa dan a kitengte hattuum in atungtang uh gen a, thunun dingte a thunun zou chieng in Dan nina (pindan) ah kitensah thei ahiding hi.

b. Pawl dang a kiteng dingte:

I Hattuom in apom theilou, hattuum pawl dang dan a kiteng ding mawngmawngte khu i Hattuom dan sung a mi hinanlezong laitah ahisihleh puonsah thei ahisih ding hi.

8. Kitenna Mun:

a. Biehinn a kiteng dingte:

I Hattuom mi, dan sung a um leh Hattuom pawl danga dan zoukim i pomtheite kiteng ding khu Biehinn a kitensah ding ahi.

b. Biehinn zangtheiloute:

Hattuom dan a kiteng ding, kitenna ding a Biehinn zang theilou dingte khu tamte ahi ding hi:-

- i. Ani un ahiei, ahisihleh khat zawsang ahei, danzoukimlou ahileh.
- ii. Ani un ahiei, khat penpen ahiei, pawl dang apat a hing lut, tua zong, danzoukimlou ahileh.
- iii. Ani un ahiei, akhat zawh pen ahiei, thunun/danpuo a um ahileh.
- iv. Hattuom theipilou a amau kiteng, pindan a gawm tha ngaite Local Chairman leh Secretary theipina in Pastor Quarter ahilouleh Local Chairman inn ah kitenna bawlsah ding ahi.

9. Kitengte Liete (Theipitute) Tungtang:

- a. Kiteng dingten theipitu ahisihleh lietu khat tuoh anei ding uhi.
- b. Kiteng dingte theipitu leh lietu khu Hattuom silbawlina thu theipitu (Witness) ahizieh un Hattuom dan sung a um ahi ngeingei ding uh ahi.
- c. Hattuom dang, Sacrament leh kitenna i pom theite khu a kitenna uah i mite khu theipitu in apang thei ding ua, amauh zong i kitenna uah theipitu/lietu in ang pang thei ding uhi.

d. Kitenna i pompi theiloute khu i kitenna ah Theipitu leh lietu ding in i zang theisih ding ua, amauh theipitu leh lietu a zong panlou ding ahi.

10. Kivonna:

Kivonna thu ah ahileh ahitheitan in Hattuum mite et a, kilawm leh hungiap, kivonna taangpi (Ngaina) zah ahoi hi. A tha khui dingten zong kiteng dingte subuoi thei ding khop zahlou hamham sawm ding ahi. Tualeh, eima dinmun toh kituoh a kivon a lungkim apoimaw hi.

11. Kiten Hun:

Kiten hun ding khu kiteng dingte, kitengsahtu leh Hattuumte lemtan dan a guot ahiding hi.

12. Kitenna kikhop:

Kitenna kikhop khu Hattuum kikhopna dangte ma bang ahia, tuaziehin bangkim khu kituptah leh ahoi thei pen a, guntah a bawl ding ahi. Tam kitenna kikhop vaiguon (Programme) puitu khu kitengsahtu Pastor mawpuoh ahi. Tualeh kikhopna pat masang a kiteng dingte khu Biehinn sung a kimtah a, a um ding uh ahi.

Kitenna kikhop Vaiguon khu tam bang a zah ding ahi.

- a. Hun patna
- b. Pasian thu sim leh thumna
- c. Kitenna hun
- d. Thugenna leh thumsahna
- e. Lasahna
- f. Guolzawlna

13. Mouhahna leh Lopna Tungtang:

Hattuum dan a Kiteng dingten a kiten masang ua amau tawndan dungzui a thu-le-laa a genlemsa uh ahiding ahi.

14. Mou Vanken:

Mouvanken toh kisai in amau tawndan dungzui ahi ding hi.

Bung - II

1. Kitenna chituom

a. Leitung mi kibahpi thu

Gingtu in gingloui Leitung dan in (danlou in) kitenpitaleh, gingtu khu thunun ding ahi. Ahin, gingloui khu agintat theina ding a, Hattuum in pan lahpi ding ahi. Ahin, kum thum (3) tan a genpi nua ua, gingtu a, asiemzou sih uleh ginglou mi in gingtu khu Khristian ahi zel apha a, atate uh zong Khristian ahi zel apha a kitenna uh zong pompi thei ahiding hi. Tuachi in, gingtu pen khu kum thum nua in dan sung a lahlut thei ahiding hi. Gingtu leh atate khu gel thaw ngei a koi (chiemte) ding ahi.

KITENNA DING THEISAHNA LAITAH/PUON KULLOUTE

b. Gingtu Hindan A hing Nuomlou kibahpi Thu:

Baptisma tangsa hi ngal a, Khristian hindan a hing nuomlou toh kiteng a, dan bang a kiten phat utlou khu, Hattuum in pui hoi sawm in pan ala ding hi. Tuabang a kum thum sung a buoipi nua a, apuihuoi zou sih uleh, Hattuum in akul bang in atungtang thu angaituo ding a, ahin a umdan hoipen khu Hattuum in lahlut tah a angai leh lahlut thei ahi giap ding hi.

c. Gingtu Hi Masang A Kiteng:

Khristian hi masang a pu leh pa dan a kitengte khu Khristian ang hi chieng un a kitenna uh khu pompieh ahiding uhi. Ahin kiten tha a ut uleh kiten thasah ahiding uhi.

d. Civil Marriage Daan A kiten Thu:

I Hattuom dan a kiteng thei ngal a, hattuum dan bang a kiteng nuom lou in Civil Marriage dan in kitengta uleh, leitung dan a kiteng ahi ua, thununna pieh ding ahi. Tambang mite khu hattuum mi koiman thepi lou ban ah, kipahpi lou ding ahi. Tambang a kitenna theipitu a pangte khu a tungtang thu uh ngaituo ahiding uhi. A kitengte khu kiten thasah kia ahiding ua; hattuum in hun asah nua in dan sung ah alalut thei ding hi.

e. Indian Christian Marriage Act A Kitengte:

- i. Khristian mi-le-sa, i hattuum dan a kiteng thei ngal a, hattuum dan in a phutte subukimlou leh hattuum phalna lai zong lalou a, Indian Christian Marriage Act a kitengte khu thununna pieh ding ahi.
- ii. I Hattuom a phalna la a, hattuum dan in a phutte subukim a, Indian Christian Marriage Act a kitengte kitenna pompieh a, thunun lou ding ahi.

BUNG - III

KITENNA LEH HATTUOM THUNUNNA KIZOP DAN

1. Kingaina Suol A Puana:

Kingaina suol a pua khu numei hi in pasal hileh thunun ding ahi. Hattuom dan a kiten a ut uleh Hattuom in a thunun nua a, pindan a gawm thei ahi. Tuachiin, thunun ahi nua uh ha guh (6) nua ah Hattuom a lungkimleh dan sung a lahlut thei ahi.

Numei mun tuom a mouthate zong a umna Hattuom (a pawtkhietna Hatuom) in thununna apieh ding ahi.

I Hattuom mi-le-sa, leitung dan a pasal ahisihleh ji neite khu hattuom dan a kiten kiasah ding ahia, a kiten ua pat ha guh nua a hattuom a lungkimleh lahlut thei hi.

2. Leitung Dan a Kitengte:

- a. I Hattuom mi, dan zang thei veve ahivang a leitung dan a kitengte khu thunun ding ahia, Hattuom in pindan a kiteng ding a pan lahpi a, kawhmu ding ahi.
- b. I Hattuom mi, dan bang a kiteng theilou, ahivang a, a koipen ahiei khat dan zang thei ngal a, leitung dan bang a kitengte khu i dan zang thei pen khu thunun ding ahia, hattuom dan zoukimte a ding in tambangte ah zong vakilahlou ding ahi. Leitung dan a kitengte khu hattuom dan zanglou a, kihoulem a, man-le-muol kipetuote ahi uhi.

3. I Hattuum Dan ua Kiteng Theilou, Civil Kitenna Dan a Kitengte:

I Hattuum mi, baptisma tanglou ahisihleh RL lah ngai, ahivang a lalou ahilouleh sil dang bang ahiei khat zieh a i dan ua kiteng theiloute, Civil kitenna dan in kitengtale uh, kingaina suol a pua bang a ngai ding ahi. Thunun ngai khu thunun ding ahi. Atungtang a ngaituo ding um zousie Presbytery Standing Committee ah tut ding ahi. (Tambang dan a kitengte khu Kumpi theina ahilouleh theipi ahizieh un a kikhenna uh zong kumpi khut ma ahiding hi).

4. Aangkawm Tungtang:

- i. Khristian nupa, akoipen ahiei khat in aangkawmtaleh, a aangkawmpi pen toh thununna pieh ding ahi. Aangkawmte khu a kiten uleh kum thum nua ah RC & RL pieh thei ahiding hi. RL alah nua un Hattuum dan a kitensah tha thei ahiding hi. A kiten tha zou chieng ua, a umdan ua hattuum a lungkimleh dan sung ah lahlut kia thei ahiding hi.
- ii. Aangkawm nua a kiteng denlou a um uleh koppi nei kialou pen khu ha guh nua a, a umdan a hattuumte a lungkimleh dan sung ah lahlut thei ahiding hi. Koppi nei kiaepeen khu aangkawmna R.L. pieh dan ngaina a pieh ahinua a lahlut thei ahiding hi.
- iii. Nupa aang kikawmsan khu a aangkawmloupen in ngaidam nanlezong a aangkawmpen khu kingaina suol a pua ahizieh in thununna pieh ding ahi.

5. Puon Zawng a Lumkhawmte:

Pasal leh numei, nupa hilou a, puon kizawn a lumkhawm ahilouleh ihmu khawmte khu aangkawm ahisihleh kingaina suol a pua bang a ngai ding ahia, thunun ding ahi.

6. Kigawm lou ding Kigawmte:

Kigawmlou ding kigawm, PCI dan in a phallou Pasal leh pasal ahilouleh Numei leh numei kingaina suol a pua a, kitengte (Homosexual/Lesbian) khu Hattuum a pat a paikhiet (Ex-communicate) ding ahi (Tam pen Hattuum a pat a paikhiet ahia, Hattuum mi-le-sa ahi nawsih ding uhi).

7. Kikhen Tungtang:

- i. Khristian nupa kikhente, adieh in Hattuum nasemtute lah a mi ahileh a mawpuohna lahkhietsah ding ahi. Nupa kikhen mawngmawng khu ginna kibahlou zieh ahisihleh Hattuum nasepna a satan neisahlou ding ahi.

8. Thununna Tuoh Minister leh Upate:

Hattuum puitu det, Minister leh Upate leh Probationary Pator-te kingaina suol a pua zieh a thunun khu lahlut ahi nua un zong a nasep ngai uh a sem kia thei sih ding uhi. Tam toh kisai a ngaituo ding kul-le-poimaw um zousie khu Synod Executive Committee in a ngaituo ding ahi.

9. Kingaina Suol a Pua Tungtang:

Danzoukim nua a kingaina suol a puate khu Pastor (Minister) ding a namdet (Ordain) ding ahisih hi (Constitution).

Bung-IV

KIKHEN, R.L. LEH R.C. PIEH DAN

Hilchetna:

Nupa khu damsung a ding a kiteng hinanlezong, mihing hi zieh in kituohlouna leh buoina a um thei hi. Nupa khu hing kikhen a, kilem kia theilou a, a um den chieng un a kitenna uh phelsah a kul a; tuachiin mihing hindan ah koppi neilou a um zing theilou hun zong a um hi. Tuaziehin, midang nei leh deina leh kulnate a um hi.

Tuabang a i Hattuum mite i hattuum dan a ji-le-pasal neituten dinmun hamsa ang tuoh ua, hattuum dan bangtah a ji leh pasal a nei kia theina ding un midang nei kia phalna Re-marriage License (RL) pieh theina ding in amau tawndan dungzui a siemtangte a kitenna uh phalsahna, Revocation Certificate (RC) pieh thei ahiding hi.

Tuabang a kitenna phalsahna leh dan bang a midang nei kia theina chi tuomtuomte khu tambang ahi:

1. Kituohlouna zieh A Kikhenna:

Khristian nupa kituohlouna zieh a um tuomte khu a umkhawm kia theina ding ua pan lahpi ding ahi. Vapui ding a Hattuum in theitawp suo a pan lah nua a zong a kipuizou sih uleh a kikhen zou uh kum thum nua in R.C. leh R.L. pieh thei ahi. A kikhen hun uh sau dan khu amau tawndan (custom) dungzui a, atungtang thu uh gen fel ahi ni apat sim ding ahi.

2. **Pasal/Numei Hina zang theilou:**

Hattuom dan a kiteng, ahivang a pasal leh numei hina zang theiloute pen kiteng den theilou a, a kikhen uleh a kikhen zou uh ha guh (Six months) nua a R.C. leh R.L. pieh thei ahiding uhi.

3. **Kipawlpi Utlou:**

Hattuom dan a kiteng, a kiten chil zan apat a, khat zawhzawh in luppi (Kipawlpi) uttasihleh, tuabang a umlou ding a hil ding ahi. Hil zou nua a zong a ut paupau sih ua, a kikhentah uleh asiemtang pen khu a kikhen ua pat ha guh (Six months) nua ah R.C. leh R.L. pieh thei ahiding hi. Ahivang in, a siemtanglounen khu a kikhenzou uh kum thum nua a R.L. pieh thei ahigiap ding hi.

4. **Ki-Aangtuohlou:**

Nupa ki-aangtuohlou zieh a kikhen a umleh R.C. leh R.L. khu kilemlouna zieh a kikhen bang a pieh thei a hiding hi.

5. **Zawlngai leh Sawn paai Ip dap Thu:**

Numei in a nauvom (Sawnpaai) a ip dap a, pasal in a zawlgai a ipmang in hatuom dan in midang kitenpita henlen, a zawlgai (Sawnpai) dap ahi thu theichien ahia, a kitenpi pen in a deilou a, a kikhen uleh kisolna ahizieh in, a dihzaw pen khu R.C. leh R.L. pieh ngal thei ahi. Ahin, a dihlou pen khu a kikhen zou uh kum thum (Three years) nua ah RC leh RL pieh thei ahiding hi.

6. **Kisolna Dang:**

Mot hun nei, Kaivei ahilouleh nupa kipawlna apat a kilawsawn thei ding natna hoilou veite in zuou a ji ahisihleh pasal anei a, a kiten nua ua, nua thei ahileh kiteng zom thei hilou ding ahiman un, adihpeen khu RC leh RL pieh ngal thei ahiding hi. A soltu khu ang hoi/dam tahleh zong akikhen nua uh kum thum (Three years) nua a RL pieh thei a hiding hi.

7. Motsan:

Khristian nupa, khatzawsang in motsan in ji leh pasal a kinei theilou khop in umta uleh, amawloupen in kum thum (3) sung a etkol nua a zong ahoi thei tuomlou a, amawpen innkuonte kihoulem a, a kikhen uleh amawloupen khu R.C. leh R.L. pieh thei ngal ahi. Tuami zou a, amawpen zong ang hoi kialeh R.L. pieh ngal thei ahiding hi.

8. Luppi Utlou:

Khristian nupa, a kiten zou uh hun bangtan ahiei nua a, khatpenpen in ha khat sung luppi (Kipawlpi) ut tasihleh, tambang a umlou ding a hil ding ahi. Tambang a hil zou nua a, a ut lou paupau a, a kikhen uleh adihpen khu a kikhen nua ua pat kum khat nua in R.C. leh R.L. pieh thei ahiding hi. Adihloupen khu kum thum zou in R.L. pieh thei ahiding hi.

9. Kitaimangsan:

Khristian nupa, khatpenpen in a ji ahisihleh a pasal khu bangma thu hillou in taimangsanlah, kum thum sung vingveng apei nua a bangma a gen sihleh adihpen khu R.C. leh R.L. pieh thei ahiding hi. Ataimangsan pen khu a taimang nua kum nga (5) nua ah R.L. pieh thei ahiding hi.

10. Huhamtah a Kibawl:

Khristian nupa, akoi ahiei in a ji ahilouleh a pasal huhamtah in soisataleh, tambang a bawllou ding a hil ding ahi. Tambang a taihil nua a tawpsanlou a, a koppi in a hinna ding tan a zauhuoi thei ding a, a thei a, a kikhen uleh Hattuom in zong a kikhen uh hoi ding a, a theipileh adihpen khu a kikhen ua pat kum khat nua in R.C. pieh thei ahiding hi. Adihloupen khu kum nga nua ah R.L. pieh thei ahiding hi.

11. Aangkawm tungtang:

Aangkawm dan chi tuomtuomte

- i. Koppi (Ji/pasal) neilai a midang toh takhiel khu aangkawm ahi.
- ii. Nungah leh tangval khu a lawmngai pen toh aangkawmtaleh, ani un aangkawm ahi uhi. Tambang a umte khu thununna pieh ding ahi. Tuate khu Pastor leh Upa ding a zong namdet thei ahisih ding uhi.
- iii. Koizong dan zawkim nua a, aangkawmna suol a puate khu Pastor leh Upa dinga namdet thei ahisih ding hi.
- iv. Nupa kikhen, R.C. leh R.L. lah masang a takhiel masapenpen khu aangkawm ahiding uhi. Khristian nupa akoipen ahiei khat aangkawm khataleh, a aangkawmlou pen khu asieng (Ngaidam) ahi.

Hinanleh, a aangkawmloupen in ngaidam theilou a, a kikhentah uleh a aangkawmloupen khu R.C. leh R.L. pieh ngal thei ahi. Aangkawm penpen khu a aangkawm ni a kipat kum thum nua ah R.L. pieh thei ahi.

12. Kikhensa Kiteng kiate:

Khristian nupa kikhen R.C. leh R.L. lazouta, ahivang in kinuateenta uleh, kiten tha sah kia a ngaisih ding hi. Tambang mite khu Pastor leh upate'n nasatah a thumpina neisah ding ahi. R.C. leh R.L. pen lahsah kia a, District Pastor Quarter or Office a kep ding ahi.

13. Kumpi Court a Kiteng a kikhen kiate:

Indian Christian Marriage Act leh Civil Kitenna dan a kitengte a kikhen uleh, akitenna uh Bieltu Kumpi Cout in kikhenna Lai (Seperation Certificate) apieh bou R.L. pieh thei leh midang neisah thei ahi. I Hattuum in Indian Christian Marriage Act a kitengte khu i pom ua, ahivang in, Civil dan a kitengte (Court Marriage) vang i pomsih uhi. Tuabang a i pomlou bang ua kitengte khu kitensah kia ding ahi. Tualeh, a kiten uh i pom theite uh khu Court in kikhenna lai (Seperation Certificate) a pieh nua a R.L. pieh a, midang toh kitensah thei ahi.

14. Ginna kibahlou jieh a kitenna R.C. leh R.L. Pieh thu:

Khristian nupa, gindan kibahlou zieh a umkhawm theilou a, gindan tuom neitu khun a pasal ahisihleh ji a nuasie a, akikhen ua, gindan tuom neitu khu a kinuale uttah sihleh adihpen khu kum khatzou nua in R.C. leh R.L. pieh thei ahiding hi.

15. Kikhen kia R.C. leh R.L. Piehdan thu:

Nupa kikhen man-le-muol gen tha lou a, a kiten kia zou un kikhen kiata uleh, R.C. leh R.L. piehna hunbi sutna leh teena ding in a kikhenna nukhiapen zah ding ahi.

Bung - V

KIKHENNA TUNGTANG

1. Kikhen Umdan:

Nupa kiteng thei nawnlou a, amau tawndan dungzui a kikhente amau tawndan dungzui a a kikhenni uh khu Nupate kikhen ni a tuot ding ahi.

2. Hattuum Nasepna Poimawte:

- a. Hattuum Committee tuomtuom member.
- b. Thugentu
- c. Sunday School Sangshie
- d. Kikhopna khuong tumtu
- e. Hunpantu
- f. Biehin daah sattu leh kotkhah vengtu (Usher)
- g. Biehin lapuitu
- h. Hattuum lapuitu
- i. Kikhopna tuohkhawm dongtu

3. Nupa Kikhenna in a sukhah Theite:

a. Ginna tuom jieh a kikhenna Tungtang:

Pasian bie dan leh gindan kibahlou zieh a nupa kituohlou a a kikhen uleh PCI thugin pom a ginna neitu khu siemtan ahi.

b. Hattuum A Semtu tungtang:

Hattuum in semtu a, alah leh neite kikhenna thu khu, a enkoltu Board ahilouleh Committee in hoitah in angaituo ding a, semtu khu adih a athei leh, a sepna apat tawpsahlou ding in, Synod in nasem dia a lahte khu Executive Committee ah angetpi ding hi.

c. Nupa Kikhen Tate Baptisma Tansah thu:

Nupa kikhen, dansung a um khatzawsang in atate uh Baptisma tansah a utleh, tansah thei ahiding hi.

d. Nupa a hattuom Taisan Tate Baptisma Tansah Thu:

Anupa ua i hattuom taisantu in atate uh hattuom ah baptisma tansah a ut ahilouleh aphal ua, a innsungmi uh mawpuohna la ding mi a umleh, atate uh Baptisma tansah thei ahiding uhi.

Bung - VI

HATTUOM DANG TOH KITENNA TUNGTANG

1. Hattuom apanna:

Khristian nupa, hattuom kibanglou a um khu ahoisih a; tuaziehin Khristian Hattuom (Pawl) dang toh kitengte khu a pasal umna hattuom dan a kiteng ding leh tuami Hattuom a umkhawm ding a ngai leh lam-et ahi uhi.

2. Roman Catholic Church (RCC):

- a. Roman Catholic Church kitenna i pom thei uhi. I hattuom dan sung a um tangval khat in, Roman Catholic nungah kitenpi sawmtaleh, tua nungah khu baptisma tangsa ahileh Hattuom dan siengthou a kitensah thei ahi.
- b. Baptisma zong tanglou ahileh, Baptisma tansah phot a, Dan siengthou a kitensah thei ahi.
- c. R.C. leh R.L. tungtang ah tam bang a bawl ding ahi. Roman Catholic Hattuom dan a kiteng, kikhensa a hing lut ahei; ang lutnua a kikhen ahei ahileh, R.C. leh R.L. pieh nua a kiten ding ahi.

3. Salvation Army (SA):

- i. I hattuom tangval, dan sung a um in, Salvation Army nungah (Sepai piching) kitenpi sawmtaleh; tua nungah khu baptisma tansah phot a, Hattuom dan siengthou a kitensah ding ahi.

- ii. Tua nungah khu Sepai (SA) piching ahishleh, baptisma tanglou ahileh baptisma tansah a, kiten theina lai tahsah nua ah kitensah ding ahi.
- iii. Salvation Army a kitengsa i Hattuum ua hing lut, baptisma tang nailou khu baptisma tansah ding ahi. Tualeh a umdan a hattuum a lungkim leh a dinmun bangzel a sepai piching khu danzoukim bangin, sepai piching hilou khu, dan zoukim lou bang a pom ding ahi.
- iv. RC leh RL tungtang ah Salvation Army dan a kiteng, ahivang a kikhensa hing lut ahei, ang lut nua a kikhen ahei ahileh RC leh RL pieh nua ah kitensah kia thei ahi.
- v. Salvation Army in Baptisma aneilou zieh un kiten masang in baptisma tansah teitei ding ahi.

4. Kizopna i neipi thei uh hattuum leh pawlpite:

a. Tam anuoi a hattuum ahishleh pawlpite toh kizopna i nei thei uhi:-

- 1. Assembly of (AG)
- 2. Evangelical Congregational Church of India (ECCI)
- 3. Evangelical Free Church of India (EFCI)
- 4. Independent Church of India (ICI)
- 5. Gangte Baptist Church
- 6. Vaiphei Baptist Church
- 7. Vaiphei Christian Church
- 8. Manipur Baptist Convention (MBC)
- 9. Evangelical Methodist Church North of East India (EMCNEI)
- 10. Reformed Presbyterian Church (RPC)
- 11. Evangelical Lutheran Christian Church (ELCC)
- 12. Presbyterian Church in India (PCI-R)
- 13. Evangelical Lutheran Church of India (ELCI)
- 14. Zo Christian Bible Church (ZCBC)
- 15. Thangkhal Bible Church (TBC)
- 16. Evangelical Baptist Convention Church (EBC)
- 17. Chin Baptist Association (CBA)
- 18. New Testament Baptist Church (NTBC)

19. Baptist Church of Manipur leh ei doctrine toh i kibahpi dangdangte uh:

b. Kitenna Tungtang ah:

- i. I hattuom tangval, dansung a um in tam atung a igente (hattuom) lah a nungah khu ji in neisawmta le uh, tua nungah khu baptisma tangsa, a hattuom dan sung ua um ahileh Hattuom dan siengthou a kitensah ding ahi.
- ii. Tua nungah khu Baptist tang nailou ahileh akiten masang ua, Baptisma tansah masah ding ahi.
- iii. A hattuom ua kitengsa hing lutte khu a kitenna uh pomsah ding ahi. Hattuom a, a dinmun bang zel ua, dan zoukim khu dan zoukim bang in, dan zoukimlou khu dan zoukimlou bang a pom ding ahi.
- iv. RC leh RL tungtang ah ahileh a hattuom a kiteng kikhen sa a, i hattuom a hing lut ahei, ang lutnua ua kikhen ahei ahileh RC leh RL pieh nua chieng bou a midang toh kitensah ding ahi.

5. Kichimatna I Neipi Theilou uh Hattuom leh Pawl Tuomtuomte:

- a. Tam anuoi a Hattuom leh Pawlte toh kichimatna i nei theisih uhi.
 - i. United Pentecostal Church (UPC)
 - ii. Seventh Day Adventist (SDA)
 - iii. Jehovah's Witness (JW)
 - iv. Church of Christ
 - v. Church of Jesus Christ (CJC) leh
 - vi. Bul-le-bal neilou leh i doctrine kibahpiloute uh.

b. Atung a pom theiloute toh Kitenna Tungtang:

- i. I hattuom tangval dansung a um in, tam atung a hattuom ahisihleh pawl a um nungah khu ji in nei sawmtaleh tua nungah khu adan ua member piching (dan zoukim) hinanlezong, i pom thei uh Baptisma tanglou ahileh baptisma tansah a, kitensah ding ahi.

- ii. I Hattuum a um nungah khat in i pom theilou pasal khat neitaleh, amau hattuum ahisihleh pawl dang a kitengsa, hing lut ahi uleh, tam bang a na pom ding ahi. I pom thei uh Baptisma tang ahituhtuoh uleh, a kitenna uh khu pomsah ding ahi. Ahivang in, kiten tha a ut uleh, baptisma tansah phot a kitensah ding ahi.
- iii. RC leh RL tungtang ah a Hattuum ahisihleh pawldang a kiteng, kikhensa a hing lut ahei, anglut nua ua kikhen ahi uleh RC leh RL pieh nua a midang toh kitensah thei ahi.

Bung-VII

REVOCATION CERTIFICATE (R.C) LEH RE-MARRIAGE CERTIFICATE (RC) TUNGTANG

1. Revocation Certificate (R.C):

Tam khu hattuom dan a, a kitenna uh theitheina suhlatna ahia, alatu in hoitah a kep ding ahi.

2. Re-Marriage Licence (R.L):

Tam khu hattuom dan a na kitengsa kikhen, tuami nua a hattuom dan ma a midang a kitenpi theina ding a phalna ahi. Alatu in a kem hoi ding hi.

3. RC leh RL Petu:

Nupa tungtang Dan a RC leh RL piehtheina chituomtuomte khu hamsatna vawt ahisihleh buoina vawt a um sihleh District Standing Committee in angaituo ding a, dan umsa apat a sil kichiensa khu RC leh RL ape thei ding hi. Buoina leh hamsatna vawt a um leh vang, Presbytery tungtawn in Synod Executive ah nget thei ahiding hi.

4. RC leh RL Ngetna Bawldan:

RC leh RL kul-le-poimawtu in a umna hattuom ah RC leh RL ngetna a bawl ding a; hattuom committee in hoitah in ngaituo in a en ding a, R.C. leh R.L. a poimawna zieh leh a hun thu ah zong pieh thei ahileh hilou zong chiengtah in a en ding a, pieh thei ngei hi a a theite khu District Standing Committee ah anget pieh ding ahi. RC leh RL ngetna ah khun tam silte khu chiemte ngai diehte ahi.

a. Min Geldan:

Hattuom Committee in a ngetsah pen min leh ahina theichien in ji/pasal/nungah/tangval chimai lou in amin dihtah agel ding hi.

b. Hun Gendan:

Kiten hun leh kikhen hun dihtah a gel khieh ding ahi. Ani (date) leh ha leh kum kimtah a gel ding ahi. Ni (date) toh bukim tah a gel thei ahisihlezhong, 'Kum huchi zat' chimailou in, akum leh ha (Month) beh khu gel a tahlat ding ahi.

c. Kitendan:

Hattuom dan a kiteng hi uh e, amauh thuthu a kiteng, pawl dang dan a kiteng chite gel chieng kilkel ding ahi.

d. Mihina:

I hattuum dan a kiteng nuomte khu a Khristian hindan uleh khawsahdan leh Baptisma tangsa ahileh hiloute siengtah a gel ding ahi.

e. Nupa Thubuoi:

Nupa Thubuoi neisa ahileh a buoina thu uh vaihawmna mun dang tutsa ahileh Vaihawmna (Court) Thulepdan gellut ding ahi.

5. R.C leh R.L Pieh Khieh Report:

District Standing Committee in RC leh RL apiekhkhieh zousie khu form umsa tungtawn in, Presbytery Office tungtawn in akum ma in Synod Office ah apelut zel ding hi.

Bung - VIII

HATTUOM DANGTE TOH I KICHIMAT DAN UH

Hattuom leh Khristian pawl dangdangte toh i kichimat leh zopdan uh khu tam bang ahi.

1. Salvation Army (S.A):

i. Hattuom member hina tungtang

Salvation Army member i hattuom ua anglut leh, sepai piching khu baptisma atan nua in hattuom danzoukim bang a pom a, sepai piching hiloute khu danzoukimlou bang a pom ding ahi.

ii. Sacrament Tungtang:

Salvation Army in Sacrament aneisah a, eite toh Sacrament a kipom leh pomlou thu gen ding aum sih hi.

iii. Nasemtu tungtang:

Salvation Army toh mi-le-sa in i kipom na ua, ahin Pasion nasepna ah vang i kizang sih uhi.

iv. Sepkhawmna Sangzaw:

Salvation Army toh gam pawlang nasepna, NCCI leh NEICC ah i semkhawm uhi.

2. Roman Catholic Church (RCC):

i. Hattuom member hina tungtang ah Roman Catholic Church toh baptisma leh danzoukimte i kipom sah uhi.

ii. Kitenna tungtang.

iii. Pasion nasepna tungtang, Roman Catholic hattuom toh nasepna leh nasemtute i kizangtuo theisih uhi.

3. a. Kizopna I neipi thei uh Hattuum ahisihleh Pawlte:

1. Assembly of (AG)
2. Evangelical Congregational Church of India (ECCI)
3. Evangelical Free Church of India (EFCI)
4. Independent Church of India (ICI)
5. Gangte Baptist Church
6. Vaiphei Baptist Church
7. Vaiphel Christian Church
8. Manipur Baptist Convention (MBC)
9. Evangelical Methodist Church of East India (EMCEI)
10. Reformed Presbyterian Church (RPC)
11. Evangelical Lutheran Christian Church (ELCC)
12. Presbyterian Church in India (PCI-R)
13. Evangelical Lutheran Church of India (ELCI)
14. Zo Christian Bible Church (ZCBC)
15. Thangkhal Bible Church (TBC)
16. Evangelical Baptist Convention Church (EBC)
17. Chin Baptist Association (CBA)
18. New Testament Baptist Church (NTBC)
19. Baptist Church of Manipur leh ei doctrine toh i kibahpi dangdangte uh.

b. I kizopna Uh:

1. Sacrament Tungtang:

Tam hattuumte khu '*Trinity Thugin*' Sacrament nei hattuum ahi chiet ua; a Sacrament uh i pompi uhi.

2. Kitenna Tungtang:

Tam kizopna i neipitheilou hattuumte toh kitenna tungtang ah Danbu et ding ahi.

3. Member Tungtang ah:

Tam hattuum a member hizingte, i mi hipai in tam hattuum a lutte zong i hattuum uah hing lut kia uleh a umdan ua hattuumte alungkimleh a hattuum ua adinmun bang zel in danzoukim khu danzoukim bang in, danzoukimlou khu danzoukimlou bang apom ding ahi.

4. Nasepna Tungtang:

Tam hattuom mi leh sate khu i pomthei ua, ahivang in Pasion nasepna ah i kizangtuo seng sih uhi.

a. Kichimatna I neipi Theilou Hattuomte:

- i. United Pentecostal Church (UPC)
- ii. Seventh Day Adventist (SDA)
- iii. Jehovah's Witness (JW)
- iv. Church of Christ
- v. Church of Jesus Christ (CJC)
- vi. Spritual Church
- vii. Christian Revival Church (CRC) leh i doctrine kibahpilou dangdangte uh ahi. Tamte leh UPC leh Jehovah witness khu Trinity Thugin pomloute ahi uhi. SDA khu Trinity pomtute lah ah apang uhi. Tam hattuom/pawl memberte khu i hattuom ua anglut uleh i baptisma uh tangsa ahisih uleh gingtha bawl a bawl mai ding ahi.
- x. Mumallou a Kiphut Pawl/Hattuom: Hattuom hidan a ding ngal, ahivang a, a pawlpi peidan uleh thugin thu a i hattuom bang ua, i pomtheiloute toh kizopna i neilou ban uah, kizahtua lou ding ahi. I pomthei baptist tangsa ahisih leh, gingtha bawl a bawl ding ahi.

b. Kitenna Tungtang

Tam kizopna i neipitheilou hattuomte toh kitenna tungtang ah Danbu et ding ahi.

Form No.1

**ZOU PRESBYTERIAN CHURCH SYNOD
The Presbyterian Church of India
MARRIAGE REVOCATION CERTIFICATE**

R.C. No.

Date.....

This is to Certify that the Marriage of

Mr

s/o

of Church

And

Mrs

d/o

of Church Solemnised by

Rev./Probationary Pastor

of the was revoked on the reason

.....

(Vide Resolution No. Dated).

Issued by

District Standing Committee Resolution No.

Dated

Secretary

..... Dated

Form No.2
ZOU PRESBYTERIAN CHURCH SYNOD
The Presbyterian Church of India

MARRIAGE REVOCATION CERTIFICATE
R.C. Report form

- 1. Name of the District :
- 2. Name of the Chruch :
- 3. Name of the Couple :
- 1. Husband :
- s/o :
- 2. Wife :
- d/o :
- 4. Date of Marriage :
- 5. Date of Seperation :
- 6. Mode of Seperation :
- 1) :
- 2) :
- 3) :
- 7. Reason(s) of Revocation:
- 1) :
- 2) :
- 3) :
- 8. Member of RC :
- 9. Date of R.C :

Form No.3

**ZOU PRESBYTERIAN CHURCH SYNOD
The Presbyterian Church of India**

**MARRIAGE REVOCATION CERTIFICATE
RE-MARRIAGE LICENCE**

R.L. No.

Dated:

This is to Certify that

Mr/Mrs

s/o, d/o.

of Church

is allowed to re-marry according to the rule of

the Zou Presbyterian Church with effect

From

Issued by

District Standing Committee

Secretary

Dated:

END NOTES

1. **Indian Christian Marriage:** Indian Christian Marriage khu a kipom a, Hattuum phalsahna toh Indian Christian Marriage a kitengte thunun lou ding ahi.
2. **Civil Marriage:** Civil Marriage khu Hattuum leh Government theipilou a amau ut dandan a kitengte ahi ua, tuabang mite khu thununna pieh ding ahi.
3. **Hattuum dan siengthou a kitenna:** Hattuum dan siengthou a kitengte khu a kiteng dingte dan piching a um, Hattuum in a theipi leh lai a tahsah a, a tungtang uh buoina umloute ahi uhi.
4. **Pindan a kitenna:** Pindan a kitenna khu Hattuum theipilou leh lai tahsah theilou a kiteng, amau kizawltai leh amau tawndan a kitengte ahi ua, tuabang mite khun Biehinn sung a tang theisih ding uhi.
5. **Alietu:** Alietu (Witness) chipen a kiteng dingte theipitu ahi ua, PCI dan dungzui in kiteng dingten theipitu khat tuoh a nei ngeingei dingua, amaute khu dan zoukim mi ahiding uhi.
6. **Kitenna a Mounu lut dan leh tou dan:** Kitenna Biehinn sung ah Mounu khu a lietu in ahing pui ding a, a touna ding uah apasal ding toh Pastor in a toukhawmsah pai ding hi.
7. **Dan zoukim:** Dan zoukim chipen Baptisma tangsa, Hattuumte kivaipuohna a lahlutsate china ahi (PCI Constitution Bung-II No. 1.a.i)
8. **Kitenna lai:** Kitenna lai khu kiteng dingte sienthou leh sienthou lou etna ahia, pasal hi in numei hileh Hattuum in lai tahsah ding ahi (PCI Constitution Bung-III No. 2.b.i).
9. **Thununna pieh dan:** Pasal hi in numei hileh Hattuum danlou bang a kitengte khu thununna pieh ding ahia, tua thununna i pieh thu khu numei ahileh a tunna Hattuumte theisah ding ahi.

~~~~~



**NUPA TUNGTANG DAN**